

## 附錄二

### 翠巖禪師警僧銘

凡一披緇，便非庸類，豈可泛常？僅同俗輩！立志立心，宜勇宜銳。處眾處獨，宜韜宜晦。若啞若聾，如癡如醉。埋光埋名，養智養慧。隨動隨靜，忘外忘內。離聖離凡，拔群拔萃。一粥一飯，信施信餽。飽享飽飡，須慚須愧。勿效庸僧，成群逐隊！說李說張，雜癡雜穢。爭是爭非，誇能誇會。本性本真，盡盲盡昧。凡戒凡律，或犯或背。虛朝虛暮，喪用喪歲。可悲可憐，必泥必墜。常警常醒，滅殃滅罪。